

四庫全書

史部

欽定四庫全書

通志卷七十六

宋 右廸功郎鄭樵 漁仲 撰

昆蟲草木略第二

木類 果類 蟲魚類 禽類 獸類

木類

伏苓曰茯苓其抱根者曰茯神典術云松脂入地千年為茯苓今詳茯苓乃松脂所化而云千年未必耳龜策

傳云茯苓在菟絲之下今詳茯苓生山林而菟絲生人間叢薄自清濁異趣非同類相感者

琥珀漢書云出罽賓國舊云松脂入地千年化成又云茯苓千年為琥珀又云松脂內溢入地而為茯苓外溢入地而為琥珀今之所得其中則有蚊蟲蜂螳之類如生此皆是未入地所著者又云楓脂千年為琥珀大體中土不生來從外國皆云初得之如桃膠便可啖須臾則堅凝今人有煮鰾雞及青魚枕偽為之者

鑿曰鑿珀舊云琥珀千年為鑿然不生中國不可知也  
栢爾雅曰栢栲生於乾陵者其木之文理多作菩薩手  
雲氣人物鳥獸之形

桂本草有桂菌桂牡桂三條云菌桂無骨正圓如竹牡  
桂一名棧一名木桂古云丹桂者謂其皮赤耳其花實  
似吳茱萸藥中之靈物而薑桂之滋為食味所重呂氏  
春秋云桂枝之下無雜木雷公云桂枝為丁入木中其  
木即死江南李後主患清暑閣前草生徐鉉令以桂屑

布階縫中宿草盡枯爾雅云檟木桂

杜仲曰思仙曰思仲曰木綿其葉似辛夷嫩時可食江南人謂之綿芽

荆又有蔓荆牡荆之別荆可以作箠者今人謂之黃荆蔓荆亦曰小荆其實入藥用牡荆亦用實登真隱訣注云北方無識者又云梁天監三年將合神仙飯奉敕論牡荆曰荆花白多子子麤大歷歷疎生不過三兩莖多不能圓或褊或異或多似竹節葉與餘荆不殊蜂多採

牡荊牡荊汁冷而甘餘荊被燒則煙火氣苦牡荊體慢  
汁實煙火不入其中主治心風第一于時遠近尋覓不  
得猶用荊葉則牡荊殆絕矣

寄生生于木上有兩種一種大者葉如石榴一種小者  
葉如麻黃其實皆相似云是烏糞感木而生入藥以桑  
上者良一名宛童一名寄屑一名寓木爾雅云寓木宛  
童詩云蔦與女蘿施于松上大者曰蔦小者曰女蘿生  
松上者曰松蘿

五加曰豺漆曰豺節葉作五又蘄州呼為木骨入藥用  
根皮道家呼為金鹽母與地榆皆可煮石故曰何以得  
長久何不食石蓄金鹽母何以得長壽何不食石用玉  
豉玉豉者即地榆也又曰寧得一把五加不用金玉滿  
車寧得一斤地榆安用明月寶珠

薰陸香即乳香南方草木狀云薰陸出大秦國其木生  
於海邊沙上盛夏木膠流出沙中夷人取之賣與賈客  
沈括云乳香即薰陸如乳頭者為乳香塌地者為塌香

雞舌香即丁香陳藏器以雞舌香為丁香母今按沈括  
考究諸義直是丁香無疑齊民要術云雞舌香世以其  
似丁子故一名丁子香應劭為漢侍中年老口臭帝賜  
雞舌香含之後來三省故事郎官日含雞舌香欲其奏  
事對答芬芳日華子曰丁香治口氣正以此也

辛夷曰辛矧曰侯桃曰房木北人曰木筆南人曰迎香  
人家園庭亦多種植離騷云辛夷車兮結桂旗

木蘭曰林蘭曰杜蘭皮似桂而香世言魯班刻木蘭舟



在七里洲中至今尚存凡詩詠所言木蘭舟即此也

榆曰零榆曰白粉曰白榆其類有十數種榆即大榆也  
生莢如錢古人採其初生者作糜羹食之令人多睡故  
嵇康謂榆令人瞑也今不復食者惟用作醬取陳者良  
其皮至粘滑可膠瓦石北人用膠磴甬儉歲農人食之  
以當糧有一種刺榆有鉞刺如枳其葉如榆淪而為蔬  
則滑美勝於白榆爾雅云樞莖唐風云山有樞即刺榆  
也

槐有二種爾雅云櫟槐大葉而黑謂大葉而黑者櫟也  
又云守宮槐葉晝聶宵炕謂晝聶合而夜炕布者守宮  
槐也又云槐小葉曰榎大而皴揪小而皴榎然揪梓類  
也櫟桐類也不可謂之槐

楮亦謂之穀其實入藥其皮造紙濟世之用也桑穀共  
生者即此也

枸杞曰杞根曰地骨曰枸杞曰地輔曰羊乳曰却暑曰  
仙人杖曰西王母曰枸杞曰托盧曰天精曰却

老曰地仙苗爾雅云杞枸攢世言有兩種無刺者曰枸杞有刺者曰枸棘又云蓬萊南邱村者高一二丈其根盤結甚固其村之人多壽考南地生者名枸棘有刺延蔓如草萊沈括云陝西極邊生者高丈餘大可作柱葉長數寸無刺根皮似厚朴甘美異他處大體出河西諸郡其次江淮間埂上者實如櫻桃暴乾為餅膏潤有味降真香曰紫藤香主天行時氣家舍怪異和諸香燒煙直上天召鶴盤旋於其上

厚朴曰厚皮曰赤朴曰烈朴曰重皮其植曰榛其子曰  
逐折

猪苓曰猓屎曰豕橐曰地烏桃

竹之類不一爾雅云桃枝四寸有節今桃枝竹也唐人有  
桃竹杖詩以其宜為杖也又云鄰堅中此竹類而中  
實者今人謂之木竹也又云籐茶中此竹類而中虛薄  
者又云仲無筍今之篋簍竹也又云篋箭筍此箭筍凡  
筍類惟箭筍為美故會稽竹箭有聞焉又云篠箭今箭

竹小而希節者然竹之良者惟有簞竹謝靈運所游之澗今在鴈蕩其自死筍則謂之仙人杖

枳生江北橘生江南考工記曰橘逾淮而北為枳言橘過淮則亦化為枳矣故江北有枳無橘江南枳橘皆有穀曰吳茱萸或謂之檓續齊諧記云汝南桓景隨費長房學長房謂曰九月九日汝家有災可急令家人縫絳囊盛茱萸以繫臂上登高飲菊花酒此禍可消景如其言舉家登高山夕還見雞犬牛羊一時暴死長房聞之

曰此代之矣世人此日登高飲酒帶茱萸囊由此爾又  
風土記曰九日折其房挿頭辟惡氣今人多臨井植之  
云飲其水則無瘟疫

山茱萸其實似萇楚之實一名蜀棗一名雞足一名魁  
實

秦皮曰石櫬曰盆桂其用在皮故曰秦皮亦曰岑皮其  
木似檀俗呼為白櫬木取其皮漬水染筆而書之作青  
色故墨家用之

梔子曰木丹曰越桃其花六出西域謂之簷蔔花

合歡曰合昏曰青裳曰夜合其木似梧桐枝弱葉繁互相交結每一風來輒似相解了不相牽綴植之庭階使人不忿其葉至暮而合故曰合昏今人皆謂之夜合花嵇康云合歡蠲忿萱草忘憂

秦椒曰檓田野人呼為樛子爾雅云檓大椒

衛矛曰鬼箭莖有三羽狀如箭翎俗謂之狗骨

紫葳曰陵苕曰茝華曰女葳曰陵時曰陵霄藤生依緣

大木今人謂之凌霄花有黃白二種爾雅云苕陵苕黃  
華藥白華芡白華者少故詩云苕之華云其黃矣

蕪荑曰無姑曰蕪蕪曰姑榆爾雅云莖荑蕪蕪牆榆類也  
實似榆莢臭如玃可作醬

欝子曰食茱萸曰越博雅云欝越與吳茱萸俱有藪名  
內則云三牲用藪是欝子也爾雅云椒檛醜茱

茶曰欝曰藪曰薺其芽曰茗爾雅曰欝苦茶本草云茗  
苦茶其品最有優劣薛能詩云鹽損添宜戒薑宜著更



誇茶而入薑鹽則下品也想薛能未知滿甌香雪之興故云

五木耳曰櫛蘇恭云楮槐榆柳桑之耳也其桑耳曰桑茵曰木麥曰桑巨曰桑黃

棘與棗皆有刺故棘文列刺棗文複刺切韻云棘小棗也不生江南其刺曰棘鍼曰棘刺其實曰薪藁曰馬胸曰刺原爾雅云終牛棘注云馬棘也刺麕而長

菴摩勒即餘甘也梵名之異耳

盧會曰訥會曰奴會俗呼為象膽木中脂也

石南曰鬼目

巴豆曰巴椒

椒曰唐藪曰陸撥曰南椒生於漢中者曰漢椒蜀中者曰蜀椒巴中曰巴椒

莽草曰春草曰芒草曰薺爾雅云莽數節以其似竹而中實促節離騷云朝搴阰之木蘭兮夕覽洲之宿莽

郁李曰爵李曰車下李曰棣爾雅云常棣棠棣詩云常

棣之花鄂不韡韡

鼠李曰牛李曰鼠梓曰栢曰山李曰桤曰苦楸即烏巢子也爾雅云桤鼠梓詩北山有桤

杉曰被曰𦵏松類也而材為良爾雅云被𦵏

蔓椒曰豕椒曰猪椒曰彘椒曰狗椒以其作狗彘之氣又曰地椒言生於地上

鈎樟曰掄亦樟之類也爾雅云掄無疵又名無疵

豫章其木甚大南都之郡因此得名今人謂之樟木

雷九曰雷矢曰雷實

檠榆類也而枚烈其實亦如榆筴似錢之狀

楊之類亦多白楊曰高飛曰獨搖人多種於墟墓間故  
曰白楊多悲風蕭蕭愁殺人水楊曰楊柳詩云楊柳依  
依又云蒲柳爾雅云楊蒲柳其條可為箭簳故左傳云  
董澤之蒲崔豹云水楊即蒲楊任矢用或言翟符亦水  
楊也移楊曰移曰扶移其木大數十圍無風葉動華反  
復合所謂唐棣之華偏其反而崔豹云移楊圓葉弱蒂

微風大搖故又曰一名高飛一名獨搖與白楊之名相近故郭璞云移似白楊

柳之類亦多柳曰天棘南人呼為楊柳楊與柳實兩種說文揚蒲柳也柳小楊也斬其枝橫倒曲直挿之皆生其花謂之絮隨風如飛雪落地如鋪氈故騷人之所取興也杞柳亦曰澤柳可為栝捲者爾雅曰旄澤柳

桐之類亦多陶隱居云有四種青桐葉皮青似梧而無子梧桐色白葉似青桐有子其子亦可食白桐與岡桐

無異惟有花子耳花二月舒黃紫色禮云桐始華者也  
一名椅桐人家多植之岡桐無子今此云花便應是白  
桐也白桐岡桐俱堪作琴瑟據此說則白桐者梧桐也  
其材可作琴瑟諸桐惟此最大可為棺槨左傳云桐棺  
三寸爾雅云所謂櫬梧又謂榮桐木者此也詩云椅桐  
梓漆爰伐琴瑟注疏家不能別椅是岡桐桐是梧桐梓  
似楸別是一物爾雅謂之椅梓誤矣又有一種楨桐夏  
月繁花其紅如火又有紫桐花如百合又有刺桐其花

側敷如掌枝幹有刺花色深紅又有一種實如罌子粟可作油陳藏器所謂罌子桐也

藥荊曰頑荊莖葉似石南

紫荊人多種庭院間即田氏之荊也

南藤曰丁公藤南史解叔謙鴈門人母有疾夜於庭中稽顙以祈聞空中曰得丁公藤即愈訪鑿及本草皆無乃至宜都山中見一翁伐木云丁公藤療風乃拜泣求得之及漬酒法受畢失翁所在母疾遂愈

黃藥即藥實根也宋武帝患手瘡經年有沙門與一黃藥傳即愈又秦州出者謂之紅藥子葉似蕎麥枝根赤色

梓與楸相似爾雅注以為一物誤矣按雜五行書曰含西種楸梓各五根令子孫孝順所以人家多種於園亭陸璣謂楸之疏理白色而生子者為梓齊民要術云白色有角者為梓無子為楸是皆不辨楸梓也梓與楸自異生子不生角



蒴藿曰陸英葉似火杓莖有節節間分枝弱植高丈許  
芹為水英接骨為木英蒴藿為陸英謂之三英

枳椇曰木蜜蜀人謂之枸小雅南山有枸是也陸璣云  
似白楊其子大如指長數寸噉之如飴故曰木蜜

烏白曰援曰拒柳田人謂之柳葉杓臭而可染皂子可  
壓油爾雅云援拒柳

訶梨勒如檄攬其未熟之子隨風飄墮者名隨風子  
樗似椿北人呼為山椿江東人呼為虎目葉脫處有痕

如檇蒲子又如眼目故有其名其材易大而不中器用  
又有一種山檇極似此詩唐風所謂山有檇是也故爾  
雅云檇山檇注謂檇以檇色小白生山中亦類漆俗云  
檇檇檇漆相似如一檇即椿也

櫟曰橡亦曰榲其實作栲曰皂斗曰橡斗然有二種南  
土多榲北土多櫟爾雅釋木云櫟其實栲詩秦風云山  
有苞櫟並此也其釋木云栩杼與唐風云集于苞栩並  
是柞木而陸璣誤謂是此耳橡實之類極多大體皆梟

屬也可食有似栗而圓者大小有三四種周禮籩人所謂榛實是也二三實作一抔正似栗而小者大小有三四種爾雅所謂栲栳是也注云子如細栗江東人亦呼為栲栗今俗謂之為茅栗猴栗柯栗皆其類也或曰櫛之實似櫟而小不可食

楊櫨曰空疏良材也

南燭曰烏草曰猴藥曰男續曰後草曰維那木曰黑飯草以其可染黑飯也道家謂之青精飯亦曰牛筋言食

其飯則健如牛筋也吳越名猴菽又名染菽亦名文燭  
經冬不凋春夏採枝莖秋冬採根此木類而叢生高三  
五尺亦似草故號為南燭草木圖經云人家多植於庭  
院間俗謂之南天燭其實如梧桐子勻圓黑色九月熟  
兒童食之極美今茅山道士採其嫩葉染飯謂之烏飯  
甚甘香可以寄遠杜詩云豈無青精飯使我顏色好謂  
食此能變白駐顏故仙經云子服草木之王氣與神通  
子食青燭之津命不復殞並謂此也

鹽麩子曰叛奴鹽蜀人曰酸桶吳人曰烏鹽其實秋熟為穗著粒如小豆其上有鹽如雪可以調羹戎人亦用此謂之木鹽故有叛奴鹽之名

無患子曰喋婁曰桓其子勻圓如漆今人貫為數珠古今注云程雅問木曰無患何也答曰昔有神巫曰淫眊能符効百鬼得鬼則以此木為棒棒殺之世人相傳以為器用厭鬼故曰無患

檉曰河柳曰雨師曰春柳木中脂曰檉乳本草謂之赤

檉木以其材赤故也大槩杉松之類而意態似柳故謂之檉柳爾雅曰檉河柳其材可卷為盤合又曰攢落郭云可以為栝器素此赤檉也又有一種名赤楊又名水松與此相似而植之水邊其葉經秋盡紅人多植於門巷杜詩蘋檉曉夜希即此也

益智子葉似蘘荷實如李核去皮用之其中仁如梔子縮紗之類可蜜煮為粽食昔盧循為廣州刺史遺劉裕益智粽裕答以續命湯是此也按蘇軾記云海南產益智

智花實皆長穗而分為三節其實熟否以候歲之豐凶  
其下節以候蚤禾其上中亦然大豐則實凶歲皆不實  
蓋罕有三節並熟者其為藥也止治益於智其得此名  
豈以知歲邪

木槿曰舜曰掇曰櫚曰及齊魯名王蒸其植如李五月  
始花故月令云仲夏之月木槿榮此木類也爾雅云入  
草例者樊光云其華朝生暮落與草同氣故在草中今  
人謂之朝生暮落人多植庭院間唐人詩云世事方看

木槿榮言可愛易凋也亦可作籬故謂之槿籬

椶櫚曰椶櫚曰箭曰王慧注云葉可為帚萐然有兩種  
一種有須可作繩耐水一種小而無須葉可為帚葩未  
吐時割去須而取之曰椶魚淪而食之甚美南方又有  
虎散枕榔冬葉蒲葵椰子檳榔多羅等與椶櫚同類

芫花曰去水曰毒魚曰杜芫曰敗華曰兒草曰黃大戟  
其根曰蜀桑根苗高三二尺葉似白前及柳葉根皮似  
桑根正二月花紫碧色頗似紫荊而作穗絳州出者花



黃謂之光花爾雅云抗魚毒本草亦云可用毒魚其皮可浸汁藏梅

五倍子曰文蛤曰百蟲倉

靈壽木漢書孔光年老賜靈壽杖顏注曰木似竹有節長不過八九尺圍可三四寸自然有合杖之制不須削治也

柞木曰械曰棚曰杼爾雅云棚杼詩折其柞薪又曰柞械斯拔陸璣云柞械櫟也三蒼云械即柞也其葉繁茂

其木堅韌有刺今人以為梳亦可以為車軸

果類

棗之類多爾雅曰棗壺棗郭曰棗大而銳上者為壺又  
邊要棗郭云細腰者今謂鹿盧棗又曰擠白棗郭云即  
今棗子白熟又曰櫛酸棗今藥家所用酸棗仁孟子所  
謂養其櫛棘是也又曰楊徹齊棗未詳又曰遵羊棗郭  
云實小而圓紫黑色俗呼為羊矢棗孟子所謂曾皙嗜  
羊棗是也又曰洗大棗郭云今河東猗氏縣出大棗如

雞卵本草云一名良棗一名美棗一名乾棗謂大棗也  
爾雅又曰煮填棗未詳又曰蹶泄苦棗其子味苦哲無  
實棗不著子者還味捻棗郭云還味短味

橘柚之類多爾雅曰櫟棗即大柚也其大如杼皮穰極  
厚又曰柚條今謂之柚似橘而大皮穰稍厚然皆不可  
口或言櫟即枳蓋江北無橘所以爾雅只載枳柚江南  
所產有柑有橘有橙人所常食三者之間而有數品又  
有枸櫞生於南方土人謂之香櫞如瓜以穰厚者為美

梅之類多爾雅曰梅柟又曰時英梅梅類而實小謂之雀梅

梨之類多爾雅曰榹蘿山梨也又曰梨山槁野出之梨小而酢者又曰杜甘棠詩所謂蔽芾甘棠也謂之棠梨其花謂之海棠花其實謂之海紅子又曰杜赤棠白者棠此別棠梨赤白之異也

木瓜爾雅曰楸木瓜

豆蔻曰草果亦曰草豆蔻苗葉似山薑杜若輩根似高

良薑花作穗可愛故杜牧云豆蔻梢頭二月春南人亦採其花淹藏以當果品

葡萄藤生傳自西域史記云大宛以葡萄為酒富人藏葡萄酒至萬餘石久者十數歲張騫使西域得其種而還中國始有又有一種曰嬰菓謂之山葡萄野出其實如葡萄而小亦堪為酒其莖主嘔逆斷其兩頭節炊之有汁出如通草

蓬蘽曰覆盆曰陵蘽曰陰蘽今人謂之莓大小有數種

有蔓生者有叢生者有樹生者惟叢生者大而可愛謂之蓬蘽其樹生者謂之覆盆子亦謂之西國草亦謂之畢楞伽爾雅云莖缺盆其鋪地蔓生者曰地莓爾雅云蘼薺者地莓也

蓮爾雅曰荷芙蕖其莖茄其葉蓮其本密其葉莖實蓮其根藕其中的的中薏按本草謂近根處白莖也實謂蓮房的謂蓮子亦謂之敷爾雅曰的敷薏謂蓮子中苦心又按本草藕實莖一名水芝丹一名蓮宋太官

作血蝟庖人削藕誤落血中遂散不凝自此鑿家方知其散血也

芡曰為子曰鉤曰芡曰鴈喙實曰鴈頭實曰雞雍實本草曰雞頭實爾雅鉤芡葉大如荷皺而有刺俗謂之雞頭盤花下結房形類雞頭實正圓如榴核大根謂之葎菜莖謂之為耿亦堪為茹

芡實即菱也俗謂之菱角可以當糧菱亦作菱爾雅菱葎攢注云今亦謂之菱攢

櫻桃曰朱茱曰麥甘酣曰楔曰含桃曰荆桃曰李桃曰奈桃爾雅云楔荆桃禮含桃先薦寢廟

柿烏者謂之柝

木瓜短小者謂之楨檣亦曰蠻檣俗呼為木梨禮記謂之檣梨鄭氏誤謂梨之不臧者

甘蔗有三種赤色者曰崑崙蔗白色者亦曰竹蔗亦曰蠟蔗小而燥者曰荻蔗

芋曰土芝其母曰芋魁史記蜀卓氏云汶山之下沃野



有蹲鴟至死不饑正謂芋魁蓋其形似也

烏芋曰藉姑曰水萍曰白地栗曰河鳧茨曰槎牙今人謂之茨菰其葉曰剪刀草曰燕尾草

鳧茨爾雅曰芍鳧茈

荔支亦曰離支始傳於漢世初出嶺南後出蜀中故蜀都賦云旁挺龍目側生荔枝南海藥譜云荔枝熟人未採則百蟲不敢近才採之則烏鳥蝙蝠之類無不殘傷然亦不必荔枝諸果皆然東觀漢記云南海舊獻荔枝

龍眼十里一置五里一墩奔馳險阻道路為患孝和時  
唐羌上書言狀帝詔太官勿復受獻蓋此物易變一日  
色變二日味變三日色味俱變古詩云色味不踰三日  
變舊時採貢以蠟封其枝或蜜漬之而近代奸幸之徒  
連株以進南人苦之不知土地所產之異而輒為人患  
何也無乃尤物者與

龍眼曰益智曰龍目曰亞荔枝曰荔枝奴其味清甜荔  
枝才過即食龍眼

桃之類多爾雅曰旄冬桃今謂之旄桃藤生出山谷或言即寒桃也十月熟故謂之冬桃又曰攄桃山桃今野出之桃也味酸苦不解核桃之實乾而不落其中實者曰桃梟曰梟景本草云主殺百鬼精物上古有神荼與鬱壘兄弟二人桃樹之下閱百鬼無理者縛以葦索飼虎今人本此而作桃符

李之類多爾雅曰休無實李一名趙李又曰座接慮李今之麥李即青李也又曰駁赤李此赤李著粉者也陶

隱居云李以姑熟所出南居李解核如杏子者為雀  
菴羅果若林檎而極大佛書多言之

石榴本草謂之安石榴爾雅云劉劉杙劉與榴通用故  
也一名丹若一名若榴其甜者又名天漿入藥多用酸  
榴

橄欖最療鯀鮫毒其木作楫撻著魚皆浮出故知物有  
相畏者也

榛有三四種果類也似栗而小正圓

蟲魚類

蟬之類多爾雅及他書多謬悠惟陶弘景之注近之本  
草蚱蟬注云瘕蟬也瘕蟬雌蟬也不能鳴者蟬類甚多  
莊子云蟪蛄不知春秋則是今四月五月小紫青色者  
而離騷云蟪蛄鳴兮啾啾歲暮兮不自聊此乃寒蜚耳  
九月十月中鳴甚淒急又二月中便鳴者名蟬母似寒  
蜚而小七月八月鳴者名蜩螗色青今此云生楊柳樹  
上是詩云鳴蜩嘒嘒者形大而黑昔人歌之故禮有雀

鷓鴣范范有冠而蟬有綏亦謂此蛸復五月鳴俗云五月不鳴嬰兒多天今其療亦專主小兒也按陶此說今實考其物寒蟬蟬母蛸類也蛸螭與蛸蟬類也蛸類在階除間及叢薄中夜鳴日不鳴蟬類在木上日鳴夜或鳴字林云蟬蟬蛸也莊子所謂蟬蛸者蟬類之別名爾而正名蟬蛸乃是寒蟬又蟬蛸條本經云一名蟬蛸寒蟬與蟬蛸類也故名號相亂凡本草所載名號有相亂者皆是物類近似故有互名非若他傳釋有名號相亂

者非互名也皆是訛謬蜩蟬一物爾方言云楚謂蟬為蜩宋衛謂之蟬蜩陳鄭謂之蜩蜩秦晉謂之蟬究而言之實為二物夏小正云五月蟬蜩鳴七月寒蟬鳴是其義也今就而驗之有四五種有大如雀黑色其鳴震巖谷者是爾雅所謂蜩馬蟬是也五月以前鳴者似大蠅而差大青色或有紅者夜在草上日在木上聲小而清亮此則正謂之蜩七月以後鳴者似蚩色亦斑此則正謂之蟬亦名蜩螗而陶謂七八月鳴者名蜩螗色青此

誤也立秋已後青紅二色者盡無之矣獨斑蟬盛焉有  
一種如大黃蜂黑色倦飛亦倦鳴故謂之痲蟬即蟬之  
雌者爾本草蚱蟬是也夏秋俱有蘇恭云蚱者鳴蟬也  
諸蟲獸以雄者為良以陶說為誤後來注釋者又引玉  
篇云蚱者蟬聲也明蘇說是且陶謂之痲蟬豈妄哉蓋  
據當時所用之名物而言之醫家多用蟬蛻而希有用  
蟬者故不親識其所用之名物以意測度又尋經引傳  
以釋證之爾且萬物之理若非的識其情狀求之經傳



展轉生訛况爾雅玉篇何可盡信舊云蟬是蜺娘所轉  
丸久而化成至夏便登木而蛻此說非也蜺娘轉丸但  
成其子而蟬正是蜺娘化爾又糞中蟚蛄及戴蟲之類  
亦化為蟬也蟬脫曰枯蟬曰伏蛻

龜之類多爾雅一曰神龜二曰靈龜三曰攝龜四曰寶  
龜五曰文龜六曰筮龜七曰山龜八曰澤龜九曰水龜  
十曰火龜神龜龜之最神者靈龜本草謂之秦龜亦曰  
蠃螈其甲有文似璆瑁而差薄耳故名鼈皮此龜一名

蜺螭俗呼靈螭能鳴多出涪陵其甲可以卜攝龜小龜也一名蠓龜一名來蛇龜好食蛇故亦謂之呬蛇龜郭云腹甲曲折解能自張閉江東呼為陵龜或言此龜乃蛇所化故頭尾似蛇俗呼鼃龜即此寶龜傳國者所寶文龜甲有文彩者河圖曰靈龜負書丹甲青文筮龜常在著叢下者龜策傳曰著滿百莖其下必有神龜守之山澤水火之龜皆其所生之處也火龜蓋生於火者亦猶火山國所出火鼠是也郭氏謂物有含異氣者不可

以常理推龜溺醫家謂之石腦油最難得惟以鑑照之  
龜見影則失溺急以荷葉承之又法以紙炷火上煖熱  
以點其尾亦致失溺

貝即璚瑁也說文云貝海介蟲也其甲人之所寶古人  
以為泉貨交易

蝻之類亦多爾雅云蝻蝻蟄草冬蝻負蟄蟄蝻蟄蟄蝻  
蟄蛭土蝻蟄蟄按蝻蝻蝗也草蝻草蝻也亦謂蚱蜢蝻  
蛭一名蝻蛭即一種大青蚱蜢股長而鳴甚響蟄蛭郭

云似蚣蟻而細長飛翅作聲者蟻谿似蝗而小斑色多  
生園中郭云今謂之土蟻以其在土中也

蝗之類多爾雅曰蚍蜉大蝗小者蝗螳打蝗蜚飛蝗其  
子蚍按蟻亦作蝗大蝗即馬蟻也大而黑郭云俗呼馬  
蚍蜉小蝗謂小黃蟻也以其種極多故專其名打蝗是  
一種大蟻赤色斑駁者飛蟻有翅而飛者凡蟻老則皆  
生翅能飛遂化為他類矣蚍蟻卵也似飯粒亦可為醬  
周禮醢人蜃蚍醢



云野蠶食槲葉棘葉藥葉為繭者曰蠶由食蕭葉為繭者曰𧈧蕭蒿也原蠶者再熟之蠶也淮南子原蠶一歲再熟然王法禁之者為殘桑也周禮禁原蠶者注云為其傷馬今以蠶為末塗馬齒即不能食草以桑葉拭去乃還食此明蠶馬類也物莫兩盛

蟹之類多而螃蟹為勝其蟹上有毛仙方以化漆為水服之長生以黑犬血灌之三日燒之諸鼠畢至雖云取無時然未被霜以前甚有毒不可食或曰八月一日每

蟹取稻芒長寸許東行輸送海神過八月乃可取也又有彭蜺彭蜎擁劒蝟蝶蛭並生海中唯彭蜺不擇地生多於溝渠間其膏可塗濕癰疽瘡肉不可食令人吐下至因蔡謨誤食者此也彭蜎吳人語訛為彭越南人謂之林禽可食作蝟尤佳小者名擁劒一名桀步一名執火其螯亦此三種皆如小蟹而蝟蝶一名蟬大者徑尺小者如螃蟹大隨潮退殼一退一長兩螯至彊故云能與虎鬪蟻如升大頗似蝟蚌而殼銳

蜂之類多本草蜂即蜜蜂也大黃蜂即土蜂也一名蜚  
零穴土以居今宣城所生蜂兒者土蜂也木蜂即飢瓢  
蜂也結窠如甌在木上者

蠋蠃曰土蜂曰螺贏曰蒲盧俗謂之蠋蠃糞泥入於屋  
壁間及器物旁作房或雙或隻亦入竹管中以泥封其  
口其類不一也凡蜂蟻皆不能生子只取他物吮成而  
陶隱居乃謂此生子如粟米大在房內仍取他蟲置其  
中以擬其子大為糧也以詩云螟蛉有子螺贏負之為



謬矣後來人有壞其房而看之果見有卵如粟在死蟲之上皆如陶所說此蓋不究其義也諸蟲在蟄尚不食況其形體未定猶在窠中時何得有饑飽也壞其房而見卵與死蟲者是變與未變爾將其故房看之其蟲殼皆如蛻形則非為物所食明爾且蚱蟬生於蜩螗衣魚生於瓜子龜生於蛇蛤生於雀白鵝之相視負冬蟲之相應其類不一然則螟蛉蜾蠃不為異矣

蚯蚓爾雅曰蝻蚓蜚蠊亦謂之蜚蠊江東呼寒蚓

蜻蛉爾雅曰叮蛭負勞亦謂之蜻蛉

螳螂爾雅曰不過螳螂其子蜉蝣又曰莫緝螳螂蜉蝣謂螳螂有斧蜉蝣亦曰食虻曰蜉蝣

蚰蜧關東謂之蚰蜧故爾雅曰蚰蜧入耳以此蟲能入人耳故得入耳之名

蜚爾雅曰蜚蠊肥郭云蜚即負盤臭蟲按此亦謂之負蟻即草蟲也春秋書蜚以其能害稼本草謂之蜚蠊亦謂之蜚蠊

蜨娘爾雅曰蜨蜨娘莊子曰蜨娘之智在於轉丸

楮木中蠹蟲也爾雅曰蝎蜨蛆

蠶俗呼山羊有長角斑黑色喜齧桑葉及橘柚爾雅曰

蠶齧桑

蜉蝣似蜨娘而小有文彩爾雅曰蜉蝣渠畧又曰蚊蟻  
蜉郭璞云江東呼蟻蜉以有金色

守瓜者瓜瓠之葉上黃甲小蟲能飛者爾雅曰蠶與父  
守瓜

穀蠹米穀中小黑蟲也爾雅曰蛄蜚強犂建平人呼為  
蚌子

蜈蚣爾雅曰蒺螬蛆性能制蛇見大蛇則噉其腦蛇  
不動而畏蚯蚓每遇蚯蚓亦不敢動蚯蚓以涎繞其足  
盡落

馬陸似蜈蚣而小尤多脚不能毒人曰百足曰馬軸所  
謂百足之蟲至死不僵者此也

蝦蟆之類多以蟾蜍為上曰黿曰去甫曰苦龍昔張暢

弟收為獠犬所傷醫云宜食蝦蟆鱸收甚難之暢含笑  
先嘗蓋此物但入藥用而非可食也其肪塗玉刻之如  
蠟或不可得但取肥者剉煎膏以塗玉亦軟古玉器有  
奇特非雕琢人功者多是昆吾刀及蝦蟆肪所刻也爾  
雅螯蟆有一種生於田中大者三四枚重一觔南人名  
為水雞亦名蛤又一種生山谷中黑色肉紅名石鱗魚  
並可食其小者名鼃其大於鼃而青色者曰青鼃凡蝦  
蟆之類皆不交合惟雌雄相對吐沫漸成魚子遂變而

成科斗爾雅云科斗活東亦曰活師古人科斗書蓋取象於此

馬蠃爾雅云蠃馬蜨郭云馬蠃蚋俗呼馬蠃方言云北燕謂之蛆蝶其大者謂之馬蚋蚋即蠃也

蠃蟲曰蝱其毛能螫人故爾雅曰蝱毛蠃又曰蠃蝱者黑毛蟲也其毛皆能射人

蠃螬爾雅云蝱蠃螬糞土中大白蟲也本草一名墳蠃一名蜚蠃一名勃齊

蝮蟻爾雅云蝮蟻蝮木中蠹蟲也方言關東謂之蝮蟻  
梁益之間謂之蝮

鼠負瓮底白粉蟲也爾雅云蟠鼠負又曰蚍威委黍詩  
蚍威在室蠨蛸在戶

牛蟲蠅類噉牛馬血爾雅云强蜥

衣魚亦謂之蠹魚以能蠹衣裳書帙亦謂之蛎魚亦謂  
之蟬爾雅云蟬白魚

莎雞曰酸雞曰樗雞曰天雞曰樗鳩曰輶爾雅云輶天

雞黑身赤頭似斑猫

土蛹爾雅曰國貉蟲蠻郭云今呼蛹蟲為蠻

螢火爾雅云螢火即炤本草一名夜光一名放光一名  
熠燿詩云熠燿宵行呂氏春秋云腐草化為螢

螻蛄曰螻蛄曰天螻蛄曰螻蛄亦曰螻蛄故爾雅云螻蛄  
天螻蛄又曰螻蛄螻蛄方言云南楚謂之杜拘此物頗協神  
鬼昔人獄中得其力者今人夜忽見出多打殺之言為  
鬼所使也荀子所謂梧鼠五技而窮蔡邕勸學篇云碩



鼠五能不成一技者此物爾魏詩所謂碩鼠者大鼠也  
蝸牛曰蝸蛄曰陵蟲曰土蝸曰附蝸爾雅蚶蝸蛄凡  
羸之類皆負殼惟此能脫殼而行頭有兩角故曰蝸牛  
水蛭曰蛟曰至掌

蠓之類多爾雅云蠓蟻蠓似蚋而小斜陽則羣聚鬪飛  
蜥蜴之類多爾雅云蜥蜴蜥蜴守宮也今按小而  
青者曰蜥蜴大而黃者曰蠃蜥蜴最小在牆間砌下者曰  
守宮種類既異而此釋為一物恐亦未審也又按本草

蜥蜴謂之石龍子一名山龍子一名石蜴楚人謂之蛇  
醫或謂之蝾螈青尾有五彩蜃蜺似蜥蜴而大黃色亦  
謂之蠪螈也守宮似蜥蜴而小在屋壁間故名守宮故  
東方朔謂非守宮則蜥蜴也守宮又名蠪虎舊云以朱  
飼之滿三斤殺之乾末塗女子身有交接事便脫不爾  
如赤誌故謂之守宮

蝟有兩種一種作猪蹄者又名蠪猪一種作鼠脚舊云  
蝟能跳入虎耳中而見鵲便仰腹受啄物有相制如此

鼯鼠曰隱鼠曰鼯鼠形類鼠而肥多膏黑色無尾長鼻常穿耕地中行旱歲則為田害

蠖屈伸蟲也爾雅云蠖蚺蚺

蝥曰蟋蟀曰青蚨楚人謂之王孫幽州人謂之促織秋至則鳴故曰促織鳴懶婦驚

蠲鼠即飛生也一名鼯鼠

青蚨一名蠲蝥搜神記曰南方有蟲名蚺蝥如蟬大辛美可食其子如蠶種取其子則毋飛來雖潛取必知處

殺其母塗錢子塗貫用錢則自還淮南子萬畢云青蚨  
一名魚伯以母血塗八十一錢以子血塗八十一錢置  
子用毋置毋用子皆自還也或云自是雄雌不相捨爾  
蛇之類多爾雅曰蝮蝮郭云蝮屬大眼最有毒今淮南  
人呼蝮子又曰蝮蝮蛇蝮音滕郭云龍類也能興雲霧而  
游其中淮南子云蟒蛇蝮又曰蟒王蛇蟒蛇之大者謂  
之王蛇又曰蝮蝮博三寸首大如擘江淮以南曰蝮江  
淮以北曰蝮

鯉鱣鯢鮓鮠爾雅無異名鯢今之黃鱣魚短鼻口在  
頷下體有三行甲無鱗大者長二三丈亦能化龍鮠今  
之鰻魚也

鮠廣雅云鮠魚也

鯢爾雅云鯢鮠小魚體圓而有點文常張口吹沙故亦  
名吹沙

鮠爾雅云鮠黑鮠郭氏謂即白鮠江東呼為鮠臣又疑  
即黃魚以背黑故亦名黑鮠

鮠爾雅云鮠鮠今泥鮠也似鱖而小

鱧爾雅云鱧大銅小者鮠即鱧也郭云今青州呼小鱧為鮠按鱧與鱧音與義同又本草作鱣一名鮠舊言是公鱧蛇所化頭有文

鱧爾雅云鮠大鱧小者鮠郭云鱧似鮠而大白色

鮠爾雅云鮠當鮠海中黃魚也似鮠而大鱗肥美多鯁江東呼其最大者為當鮠

鮠爾雅云鮠鮠刀郭云今之鮠魚也亦呼為鮠魚按鮠

魚所在有之

魮爾雅云魮魮似鰕而小眼赤多生溪澗傳麗水底難  
網捕

鰻爾雅云魮魮

鰻爾雅云魮魮今鰻魚亦呼鰻魮徽州一種鰻頭似鰻  
蛇背有五色生溪澗

鰻之類多爾雅曰鰻大鰻郭云鰻大者出海中長二三  
丈須長數尺今青州呼鰻為鰻

羸之類多爾雅云羸小者蛭郭云螺大者如斗出日南  
漲海中可以為酒杯按今所謂鸚鵡杯者出南海

蜂之類多爾雅云蜃小者玳即小蚌也一名玉玳可飾  
佩刀削詩傳云天子玉琫而玳玳是也山海經激女水  
中多蜃玳今廣州東南道極多人取以摩作碁子鬻之  
鼉亦作鮐狀如鯪鯉長一二丈者能吐氣成霧致雨善  
攻碕岸性嗜睡常閉目極難死聲甚可畏其皮可冒鼓  
凡鼃鼉之老者能變為邪魅或云多年鼉入水化為龍



梁周興嗣常食其肉後為鼃所噴便為惡瘡實彊靈之物不可輕殺

鯢爾雅云鯢大者曰鰕即雌鯨也大者長八九尺狀似鮎魚脚前似獼猴後似狗聲如小兒啼今洞庭有之

禽類

佳爾雅謂之鵠鵠亦曰祝鵠今所謂鷓鴣也謹慮之鳥凡鳥之短尾者皆謂之佳惟夫不專名焉故指佳為鵠鵠也鵠方扶反鵠方浮反

鷓鴣爾雅謂之鷓鴣居物反鷓鴣音骨嘲今謂之鷓鴣似山鵲而小短尾青黑色多聲江東亦呼為鷓鴣廣雅謂斑鳩誤矣斑鳩即鷓鴣也

鷓鴣爾雅曰鷓鴣即布穀也一名桑鳩一名繫穀江東呼為獲穀禮記謂之鳴鳩鷓鴣苦八反鷓音菊

鷓鴣爾雅曰鷓鴣郭云小黑鳥鳴自呼江東名為烏鷓按此似鷓鴣無冠而長尾多在山寺廚檻間今謂之烏鷓鴣音及按玉篇廣韻無鷓字惟有鷓字音及鷓步丁反

鵙鵙爾雅曰王鵙鳬類多在水邊尾有一點白故揚雄云白鵙舊說鵙類誤矣鵙七徐反

鳬鵙陸機云大如鵙青灰色卑脚短喙水鳥之謹愿者也

鵙爾雅曰鵙鵙鵙音格鵙鵙音忌欺郭云今江東呼鵙鵙為鵙鵙亦謂之鵙鵙

鵙爾雅云天狗魚狗也似翡翠而小青碧可愛鵙音立鵙爾雅曰天鵙郭云大如鵙雀色似鵙好高飛作聲江

東名之曰天鶚音綢繆之繆按此雀類似鷦而尾小長  
以其能鳴故人多養之俗呼告天所在寒月多有之鴈  
音樂

鷦爾雅曰鷽鷽今之野鷽鷽音六鷽力于反

鷽爾雅曰鷽鷽即鷽鷽也

鷽爾雅曰鷽鷽音洛郭云水鳥也似鷽而短頸腹翅

紫白背上綠色江東呼烏鷽鷽音駸

舒鷽爾雅曰鷽

舒鳧爾雅曰鶩鴨也

鵒爾雅曰鵒鵒水鳥也今亦謂之鵒鵒似鳧脚高毛冠  
郭云江東人家養之以厭火災

鵒爾雅曰鵒鵒音烏鵒音澤鵒鵒也形極大喙長尺  
餘頷下有胡大如數升囊好羣飛沉水食魚俗謂之淘  
河許慎云鵒也

鶩爾雅曰天雞鶩音汗逸周書曰蜀人獻文鶩文鶩者  
若鵒雉按今有吐錦雞蓋雉類惟蜀中有之仰日吐錦

甚有文彩

鸞爾雅曰山鵲今喜鵲也郭氏謂似鵲而有文形長尾  
觜脚赤鸞音握

鸛爾雅曰負雀鸛音淫郭云鸛鷁也江南人呼之為鸛  
善捉雀因名云按此即今之小鷁也蓋鷁類南方無鷹  
唯呼此為鷹

鷁爾雅曰鷁老鷁音豕郭云鷁鷁也俗呼癡鳥字林云  
句喙鳥按此蓋鷁類能捕雀句喙目圓黃可畏如拳大

小者猶俊

鵲爾雅曰剖葦注云好剖葦皮食其中蟲因名云江東呼蘆虎似雀青斑長尾鵲音遼

桃蟲爾雅曰鷦其鷽鷽音艾似黃雀而小一名鷽鷽一名鷽鷽一名桃雀俗呼巧婦

鳳凰爾雅曰鷽鳳其雌凰神鳥也其雛曰鷽鷽雞冠蛇頸魚尾龍文龜背燕頤前後五色備舉高六尺許京房云高丈二出於東方君子之國飛則羣鳥從以萬數非

梧桐不栖非竹實不食晨鳴曰發鳴朝鳴曰上翔晝鳴曰滿昌昏鳴曰固常夜鳴曰保長鳳古作朋字

鷓鴣爾雅曰鷓渠雀屬也長尾背上青赤色腹下白頸下黑飛則鳴行則搖

鷺斯爾雅曰鷺鷥亦謂之雅烏蓋雀類差小多羣飛食穀粟俗呼必鳥鷺音匹聲相近

鴛鴦爾雅曰鴛母即鴛也青州呼鴛母田鼠所化鴛鴦音如謀



蜜肌爾雅曰繫英英雞也喙啖石英故得名焉

雋爾雅曰雋周即子規也多出蜀雋郡故名焉蜀主望帝化為子規雋希規反

燕元鳥也爾雅曰鳬陸機云齊人謂之乙燕有二種爾雅又曰燕白脰鳥則知此為紫燕矣

鷓鴣爾雅曰鷓鴣陸機諸儒皆謂為巧婦誤看詩文也今按郭氏說此及方言皆謂是鷓類據下言茅鷓怪鷓則此應是鷓無緣得是巧婦鷓鷓鴣音遙寧決

狂爾雅曰茅鷃郭云今鷃鷃也似鷹而白

白鷃爾雅曰怪鷃廣雅謂之鷃鷃郭云今關東呼此屬為怪鳥

梟爾雅曰鷃即訓狐日暝而夜作賈誼所賦鷃鳥是也其肉甚美可為羹臠又可為炙漢供御物說文云梟食母不孝之鳥故冬至捕梟磔之字從鳥首在木上或說即今伯勞也食母

爰居爾雅曰雜縣海鳥也嘗止於魯東門之外又漢元

帝時琅邪有大鳥如馬駒時人謂之爰居

鳬之類多皆雀屬也爾雅曰老鳬鷖音晏雀也又曰  
春鳬鵠鵠夏鳬竊元秋鳬竊藍冬鳬竊黃桑鳬竊脂棘  
鳬竊丹行鳬喈喈宵鳬嘖嘖竊古淺字言其色之淺喈  
喈音即嘖嘖音責皆其聲然也或取其毛彩或取其鳴  
聲以命名鳬雖雀屬皆以時見亦猶鷖鴈然農家須其  
鳴以候時故又命以四時也桑鳬郭云俗謂青雀今名  
鴈背性慧可教桑棘之鳬多在是木故名行鳬者多在

雛落如雞雉然不飛去故名宵鴈者能傳衣故名鵠音汾鵠敕倫反

鷓鴣爾雅曰戴鷓鴣彼及反鴣皮及反鷓女金反郭云鷓即頭上勝今亦呼為戴勝鷓鴣猶鷓鴣語聲轉耳按方言關東曰戴鷓

鷓爾雅曰澤虞鷓字往反郭云今姻澤鳥似水鴉蒼黑色常在澤中見人輒鳴喚不去有象主守之官因名云俗呼護田雞按此鳥亦多在田中閩人呼為姑雞紡以

其聲類紡聲且聒聒不輟

鷓鴣爾雅曰鷓於計反

鷓鴣爾雅曰其雄鷓牝庫鷓類此別其雌雄之異名耳  
鷓鴣臺所化庫音脾

鷓爾雅曰沈鷓似鷓而小尾白俗呼水鷓好沒故曰沈  
鷓音施

鷓頭爾雅曰鷓鷓於鳥反郭云似鷓脚近尾畧不能行  
江東謂之鷓許交反按此鳥類野鴨而文彩不能行多

溷野鴨羣中浮游

鷓鴣爾雅曰冠雉郭云鷓鴣大如鴿似雌雉鼠脚無後指  
岐尾為鳥慙急羣飛出北方沙漠地

雉爾雅曰老鷓郭云木兔也似鷓鴣而小兔頭有角毛  
脚夜飛好食雞臣疑此即訓狐以其首似兔故有此等  
名鷓音兔

鷓爾雅曰鷓鴣鳥鷓音突郭云似雉青身白頭

狂爾雅曰鷓鴣鳥山海經云栗廣之野有五采之鳥有冠

名曰狂鳥

皇爾雅曰黃鳥即黃鸝也一名倉庚一名商庚一名鷯黃一名楚雀一名搏黍一名黃離留陸璣云常以槥熟時來故里語曰黃栗留看我麥黃槥熟不故又名黃栗留

翡翠爾雅曰鷩音律其羽可以飾器物

鷩爾雅曰山鳥郭云似鳥而小赤背穴乳出西方

蝙蝠爾雅曰服翼今亦謂之蝙蝠鼠所化故又名仙鼠

晨風爾雅曰鷗似鷁而小青黃色燕頤

鷁爾雅曰白鷁鷁音楊厥郭云似鷹尾上白

鷁爾雅曰蠅母郭云似烏鷁而大黃白雜文鳴如鷁聲  
今江東呼為蚊母俗說此鳥常吐蚊因以名云鷁蠅音

### 田文

鷁爾雅曰須羸鷁鷁也似鳧而小其膏可瑩刀劍古詩  
云馬銜首宿葉劍瑩鷁鷁音梯螺

鼯鼠爾雅曰夷由似蝙蝠而大翅尾長三尺許背上蒼



艾色脚短爪長飛且乳故又名飛生聲如人呼食火烟能  
從高赴下不能從下升高鶻音吾

鴛爾雅曰啄木鴛音列今亦謂之斲木鳥常啄木剝剝  
然取蠹蟲食

鷺爾雅曰春鉏白鷺也亦曰鷺鷥陸璣曰汶陽謂之白  
鷺齊魯謂之春鉏遼東樂浪吳揚皆謂之白鷺

雉之類多爾雅曰鷄雉鷓鴣鳩鷓鷥雉秩秩海雉鶴山  
雉雉鷄鷄雉絕有力奮伊洛而南素質五采皆備成

章曰顰江淮而南青質五采皆備成章曰鷦南方曰鷽  
東方曰鷽北方曰鷽西方曰鷽鷽音遙鷽雉即鷽雉也  
青質而有五采者鷽音驕鷽音卜鷽雉即鷽雉也朱冠  
綠臉項背有文腹下黃赤大如雞雄者有文彩據文勢  
是如此郭氏離此為四物誤矣秩秩者即海雉也郭云  
如雉而黑在海中山上鷽音狄即山雉也此與鷽雉是  
一種小異亦有文彩郭云長尾者鷽音汗即鷽雉也今  
謂之白鷽似鴿而大白色紅臉可愛鳥之健勇者惟雉

雉之有力者曰奮翬鷄皆所產之異鳥鷄鷄鷄鷄皆所呼之異鳥音儔鷄音遵

鷄鷄爾雅曰鷄鷄如鷄短尾射之銜矢射人鷄鷄鷄鷄音歡團福柔此鳥一名鷄羿言雖羿亦懈情不敢射之

獸類

麋之類多爾雅曰麋牡麋牝麋其子麋其跡纏絕有力狄鹿牡麋牝麋其子麋其跡速絕有力麋麋牡麋牝麋其子麋其跡鮮有力獬按麋麋也麋其總名也麋麋麋

麇麇麇麇麇麇麇音咎辰音加迷堅侯栗鈕又曰麇大鹿  
牛尾一角麇音炮即麇也漢武帝郊雍得一角獸若麇  
然謂之麟即此也麇音京又曰麇大麇旄毛狗足今謂  
之麇音几旄毛猥長毛也旄音冒又曰麇父麇足其脚  
似麇食栢葉而膾甚香父音甫

狼爾雅曰狼牡獾乳狼其子獾絕有力迅又曰豺狗足  
即狼也獾音亦

兔爾雅曰兔子嬖其跡远絕有力欣

豕爾雅曰豕子豬豨豨幺幼奏者羴豨豨者一名豨郭  
云俗呼小豨豬為豨子謂健豬也幺幼者郭云俗呼豕  
最後生者為幺豚奏者羴者皮理湊蹙者名羴豨豨幺  
奏羴音偉墳腰湊溫又曰豕生三豨二師一特所寢櫓  
四豨皆白豨絕有力豨壯豨櫓音增豨所臥之簣也豨  
音滴蹢也蹢蹄也豨音厄郭云豕高五尺者豨音垓

虎之類爾雅曰虎竊毛謂之號貓竊古淺字號音殘郭氏  
引古律文捕虎一賁錢三千其狗半之爾雅又曰彪白

虎魑黑虎狃無前足晉太康元年召陵扶夷縣檻得一獸似狗豹文有角兩脚即此類也或說狃似虎而黑無前兩足魑音含魑式六反狃足滑反

熊羆之屬爾雅曰羆如熊黃白文羆似熊長頭高脚猛慙過于熊其脂似熊白而羆又曰熊虎醜其子狗絕有力麋醜類也麋音咸又曰醜如小熊竊毛而黃郭云今建平山中有此獸狀如熊而小俗呼為赤熊即醜也音類

狐狸之屬爾雅曰狸狐獬貍醜其足蹠其跡夙蹠音煩  
掌也夙音扭指頭著地處又曰狸子隸貍子貍隸音曳  
貍下各反貍似狐善睡亦謂之貉郭云今江東呼貉為  
狢狢

貍爾雅曰貍貍似狸貍貍音樞萬林云貍似狸而大一  
名貍郭云今山民呼貍虎之大者為貍貍

麋羊爾雅曰麋大羊音靈陶隱居云其角多節處處員  
繞者為真惟一邊有節節疎大者為山羊按此二角俱

似羊而大在山崖間又曰羴如羊音元郭云似吳羊而大角角橢出西方

犀兕之屬爾雅曰兕似牛如野牛青色重千觔一角長三尺餘形如馬鞭柄其皮堅厚可制鎧又曰犀似豕今出交趾形似水牛豬頭三角一在頂上一在額上一在鼻上者即食角也小而不橢好食棘亦有一角者其通天犀乃是水犀角上有一白縷直上至端能出氣通天置露中不濡置屋中烏鳥不敢集屋上置米中雞皆驚



駭故亦謂之駭雞犀抱朴子曰通天犀角三寸以上者刻為魚銜之入水水常為開三尺

獫狁之屬爾雅曰蒙頌狁狀郭云即蒙貴也狀如雌而小紫黑色可畜健捕鼠勝於猫九真日南皆出之狁亦獫狁之類又曰狁狁即狁也狁善攀援

獫狁爾雅云獫狁類羆虎爪食人迅走山海經云少咸山有獸狀如牛而赤身人面馬足名曰窳窳其音如孩兒食人所說與此異獫烏八反獫羊主反

騶爾雅云騶如馬一角不角者騶騶音攜郭云元康八年九真郡獵一獸大如馬一角角如鹿茸此即騶也今深山中人時或見之亦有無角者

獠亦謂之獠爾雅云獠子獠獠音湍窶獠似豕而肥猶爾雅云猶如麕善登木說云猶獠屬也麕音几

狒狒爾雅云狒狒如人被髮迅走食人狒扶味反梟羊也俗呼山都人面長脣見人則笑笑則脣蔽其面左手操管

雖爾雅曰雖卽鼻而長尾狀如獼猴而大黃黑色尾長數尺似獼尾未有岐鼻露向上雨即以尾塞鼻或以兩指所在山中有之

麇麇爾雅曰麇麇短脰

麇有力麇呼天反郭云西海大秦國有養者似狗多力獷惡

麇爾雅云麇迅頭郭云今建平山中有麇大如狗似獼猴黃黑色多髯鬣好奮迅其頭能舉右摘人獮類也麇

音據

猩猩爾雅云猩猩小而好啼人面豕身長髮能言語好飲酒醉則人髡其髮為髮聲似小兒啼

狻麖爾雅云狻麖如獬豸食虎豹即師子也漢順帝時疎勒國獻師子似虎正黃有顙形尾端茸毛大如斗

麀爾雅云麀麀身牛尾一角此瑞應獸也黃色圓蹄馬足角端有肉麀即麟字

鼠之屬多爾雅曰鼯鼠音憤地中行者食竹根今人謂

之竹鼯伯勞所化廣雅謂之鷄鼠又曰鼯鼠刮忝反大戴禮云田鼠者鼯鼠也郭云以頰裏藏食者又曰鼯鼠鼠之最小者郭氏云謂有螫毒者一說甘口鼠也又曰鼯鼠音斯似鼯鼠夏小正曰鼯鼯則充蓋九月也又曰鼯鼠弋救反狀如鼯赤黃色大尾能啖鼠俗呼鼠郎江東呼為鼯即莊子云騏驎騏驎捕鼠不如狸鼯是也又曰鼯鼠音劬小鼠也一名鼯鼠亦謂之鼯鼯又曰鼯鼠鼯鼠音時吠並未詳又曰鼯鼠音石郭云形大如鼠頭

似兔尾有毛青黃色好在田中食粟豆關西呼為鼯鼠  
鼯音雀又曰鼯鼠鼯鼠音問終並未詳又曰豹文鼯鼠  
音廷常在木上如鼠大其文似虎豹今深林中甚多漢  
武帝時得此鼠孝廉郎終軍知之賜絹百疋又曰鼯鼠  
古覓反郭云今江東山中有鼯鼠狀如鼠而大蒼色在  
木上音覓按郭氏此說又與鼯鼠相類

馬之類多爾雅曰騊駼馬音陶徒字林云北方良馬也  
郭云色青又曰野馬郭云如馬而小穆天子傳云野馬

日走五百里又曰駮如馬倨牙食虎豹倨即鋸也山海經云中曲山有獸如馬而身黑三尾一角音如鼓名駮食虎豹可以禦兵又曰駮蹄趺善陞甌駮蹄者其蹄如趺秦時有駮蹄苑甌山嶺也郭云形似甌上大下小駮駮音昆硯又曰駮駮枝蹄趺善陞甌枝蹄如牛蹄是也牛枝蹄馬溷蹄又曰小領盜驪穆天子傳云天子駕八駿右盜驪左綠耳小領細頸也又曰絕有力駮馬高八尺曰駮音戎又曰膝皆白惟鼻四骸皆白驢四蹄皆白

首前足皆白驤後足皆白駒前右足白啓左白蹄後右足白驤左白鼻駢馬白腹驪驪馬白跨驕白州驪尾本白驤尾白驤駒顙白顙白達素縣面顙皆白惟駝骹膝下也蹠蹄也駢赤色驪黑色跨髀間也州竅也尾本尾根也尾根白曰驤尾毛白曰驤顙顙上也素鼻莖也顙額也駮驢驤駒蹄蹠驕驪驤駒音敲繪奚劬欺利聿燕晏郎的又曰回毛在膺宜乘在肘後減陽在幹第方在背闕廣減廣音淡光回毛旋毛也膺胸也幹脅也又



曰逆毛居駮音充郭云馬毛逆刺又曰駮牝驪牡鄭元  
謂七尺曰駮牝者色驪牡者色元注周禮復謂七尺已  
上者為駮又曰元駒褭驂褭奴了反鄭云元駒小馬之  
別名又曰牡曰騊牝曰駮郭云江東呼駮馬曰騊騊音  
舍草馬也又曰駮白駮黃白驪駮馬黃脊驪驪馬黃脊  
駮青驪駮青驪驪駮青驪駮驪駮白雜毛鵠黃白雜  
毛駮陰白雜毛駮蒼白雜毛駮彤白雜毛駮白馬黑鬣  
駮白馬黑脊駮黑喙駮一目白眊二目白魚孫炎云駮

赤色也青驪駟郭云今之鐵驄也青驪駟謂青黑二  
色相雜如魚鱗郭氏謂今之連錢驄是也鴉郭云今之  
烏驄駟郭云今之桃花馬陰淺黑色也駟郭氏謂今之  
泥驄蒼淺青色也彤赤色也喙口也凡此所言皆典籍  
所載之馬人或不曉其毛物故爾雅釋之驄音虔習  
駟呼縣反麟良刃反驛駟駟駟駟音陀柔保皮遐  
詮閑

牛之屬多爾雅曰摩牛爆牛擺牛犂牛獵牛犢牛獬牛

摩音麻郭云出巴中重千觔爆音電郭云即犂牛也顧  
上肉爆肤起高二尺許如索駝肉鞍一邊犍者日行三  
百里交州合浦徐聞縣出此牛按犂牛漢順帝時疎勒  
王來獻此犂音皮郭云犂牛庠小今之犍牛也又呼果  
下牛出廣州高涼郡犂音危郭云即犍牛也如牛而大  
肉數千觔出蜀中犂音獵郭云即旄牛也髀膝尾皆有  
長毛按此牛角向前毛如白雪其長毛今人以為拂子  
出荆楚間犍音童無角牛犍古覓反未詳何牛也又曰

角一俯一仰騎皆踊觭黑脣犇黑背抽黑耳犂黑腹牧  
黑脚犖其子犖體長犖絕有力欣犖騎音欺踊騰也謂  
角騰起觭音誓犇閏旬反背才細反目圈也犖音尉犖  
音權體身也犖匹外反犖音加

羊之屬多爾雅曰羊牡羴牝羴吳羊牝曰羴音墳又曰  
夏羊牡羴牝羴郭云夏羊者黑羴羴也臣疑今牡羊也  
多出夏州羴音俞然今人呼牡羊為股音古又曰角不  
齊脛音鬼又曰角三觭羴音險此謂羊角捲三匝者又

曰羴羊黃腹音煩又曰未成羊羴直呂反郭云俗呼五月羔為羴又曰絕有力奮

狗之屬多爾雅曰犬生三獫狁二師一獫狁音宗祈又曰未成毫狗郭云狗子未生毫毛者又曰長喙獫短喙獨獫駟驥二載獫獨獫獫音呼獫切獨音呼謁切獫音呼驕切又曰絕有力狽音兆虎狗也

通志卷七十六